

Neuspjeh Parlamenta u vezi sa JMB-om ne oslobađa ga odgovornosti

Visoki predstavnik je danas izrazio duboko razočarenje činjenicom da Parlamentarna skupština BiH nije našla rješenje za pitanje jedinstvenog matičnog broja (JMB).

Ustavni sud BiH je prvi put donio odluku o ovom pitanju 2011. godine, a ipak Parlamentarna skupština BiH još uvijek ne može naći načina da ispuni ovaj pravni vakuum.

„Parlament ne može dalje zanemarivati potrebe građana. Ovaj put, žrtve beskrajnog političkog prepucavanja, čega smo svi svjedoci, su najnoviji i najmlađi građani ove zemlje, novorođenčad koja ne mogu dobiti matični broj koji je potreban za dobijanje osnovnih usluga koje pruža država“, rekao je visoki predstavnik. „Očito da ovdje nešto nije u redu, a Parlamentarna skupština BiH treba da to ispravi“.

Visoki predstavnik je danas pojasnio da, bez obzira na dva neuspjela pokušaja, Parlamentarna skupština i dalje ima odgovornost da usvoji amandman na postojeći zakon kojim će ponovo pokrenuti postojeći sistem.

„Ovaj sistem je godinama dobro funkcionirao i na isti način služi svim građanima. Parlamentarna skupština BiH to mora prepoznati“, rekao je visoki predstavnik Inzko.

„Uloga Parlamenta nije okončana ovim neuspjehom. Poslanici moraju bez odlaganja naći i usvojiti rješenje u sadašnjem zakonu, te na taj način pokazati da su im građani na prvom mjestu“.